

दिनांक 13.05.2025
समय: 18.48 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी कह्यो-सशस्त्र बल देश रा गौरव ने अभूतपूर्व, अकल्पनीय अर असाधारण ऊंचाई दीनीं
- मुख्यमंत्री भजनलाल शर्मा श्री अन्न काम लेवण ने बधावो देवण सारू इण ने सरकारी कार्यक्रमों मांय शामिल करण बाबत् कह्यो
- सीबीएसई री 12वीं अर दसवीं कक्षा रा आज जारी नतीजां मांय टाबरियां बाजी मारी -सीकर री खुशी शेखावत 12वीं कक्षा मांय 500 मांय ऊं 499 अंक हासिल कीनां
- खेलो इंडिया यूथ गेम्स मांय राजस्थान 36 तमगां सागे पदक तालिका मांय दूजी ठोड़ माथे पूग्यो
- प्रदेश मांय आज तेज गर्मी अर उमस बीचे केई ठोड़ां बिरखा- भीलवाड़ा मांय ओला पड़्यां

000

प्रधानमंत्री नरेन्द्र मोदी कह्यो है के सशस्त्र बल देश रा गौरव ने नुवी ऊंचाई ताई पूगायो है जो अभूतपूर्व, अकल्पनीय अर असाधारण हैं वे कह्यो के ऑपरेशन सिंदूर देश रो मनोबल बधायो है अर देश रो एको बणायो राख्यो हैं श्री मोदी आज पंजाब रा आदमपुर वायुसेना टेशन माथे जवानां सामी भाषण दे रह्या हां प्रधानमंत्री कह्यो के वायुसेना पाकिस्तान रा हलका मांय आतंकी ठिकाणां माथे केवल 20 ऊं 25 मिनट मांय हमलो कर र ओ बतायो है के नुवी तकनीक वाळो एक पेशेवर बल ही ऐडो कर सके हैं श्री मोदी पाकिस्तान ने करडो संदेश देता थकां कह्यो के अब भारत रे खिलाफ आतंकी हमलो व्हेवण री सूरत मांय देश खुद रा लेवल माथे जवाब देवेलां प्रधानमंत्री कह्यो के देश किण ई भांत री न्यूक्लीयर धमकी सहन नी करेलां

.....

इण ऊं पैली श्री मोदी संवारे आदमपुर वायुसेना हलका रो दौरा कर र जवानां सागे बातचीत कीनीं रक्षा मंत्री राजनाथ सिंह आज नई दिल्ली मांय आला दर्जा री मीटिंग मांय देश री आतूणी सरहद माथे हिफाजती इन्तज़ामात अर हालात रो जायजो लीनां

000

मुख्यमंत्री भजनलाल शर्मा श्रीअन्न काम लेवण ने बधावो देवण सारू इण ने सरकारी कार्यक्रमों मांय शामिल करण बाबत् कह्यो हैं श्री शर्मा आज वां रा रेहवास माथे साल 2025-26 री बजट घोषणावां माथे काम करण ऊं जुड़ी समीक्षा बैठक मांय बोल रह्या हां मुख्यमंत्री कह्यो के श्रीअन्न रा पोषण बूता अर उपयोगिता ने ध्यान राखता थकां सरूआती तौर ऊं मिड-डे मील अर मां-बाड़ी केन्द्रां माथे श्रीअन्न आधारित चीजां काम लेवणो सरू करणो चाहिजे, ताकि बच्चां ने कुपोषण ऊं बचाया जा सकें श्री शर्मा अहलकारां ने श्रीअन्न री मार्केटिंग, उपज अर प्रचार-प्रसार ने बधावो देवण रा मकसद ऊं समिति बणावण रा हुकम ई दीनां

000

राज्यपाल हरिभाऊ बागडे विद्यार्थियों ने कौशल विकास माथे बत्तो ध्यान देवण बाबत् कह्यो हैं वे आज अलवर मांय राजर्षि भर्तृहरि मत्स्य विश्वविद्यालय रा दीक्षांत समारोह मांय बोल रह्या हां श्री बागडे कह्यो के कौशल अर कला रो विकास कर र विद्यार्थी भविष्य बणा सके हैं ई मौके वे सोना रा 39 तमगां समेत 46 तमगा दे र विद्यार्थियों रो मान कीनों कार्यक्रम मांय उपमुख्यमंत्री डॉ. प्रेमचंद बैरवा, वन अर पर्यावरण राज्यमंत्री संजय शर्मा समेत जनता रा केई नुमाइंदा मौजूद हां

000

आला जज न्यायमूर्ति भूषण रामकृष्ण गवई सुप्रीम कोर्ट रा 52वां मुख्य न्यायाधीश व्हेलां वे न्यायाधीश संजीव खन्ना री ठोड़ लेवेला जो आज रिटायर व्हे ग्यां न्यायाधीश संजीव खन्ना 10 नवंबर, 2024 ने कामकाज संभाळ्यो हां

000

राज्य मांय खास खनिजां रा 22 ब्लॉक री नीलामी रो काम सरु कर दियो ज्यो हैं खान अर भू-विज्ञान विभाग रा प्रमुख सचिव टी. रविकान्त आ जाणकारी दीनीं वे बतायो के नीलामी सारु 21 मई ताई टेण्डर मांगी ज्या हैं 22 मांय ऊं 14 ब्लॉक माइनिंग लीज अर 8 कंपोजिट लाइसेंस ब्लॉक री नीलामी सारु 16 अप्रैल ने निविदा सूचना जारी करीजी हीं श्री रविकान्त बतायो के चूना-पत्थर री माइनिंग लीज रा 14 ब्लॉक मांय ऊं जैसलमेर मांय 11, नागौर मांय 2 अर कोटा मांय एक ब्लॉक री नीलामी करी जा रही हैं

000

.....

000

केंद्रीय माध्यमिक शिक्षा बोर्ड-सीबीएसई 12वीं अर दसवीं कक्षा रा इम्तिहान रा नतीजां रो ऐलाण कर दीनो हैं आज जारी 12वीं रा नतीजां मांय 91 फीसदी ऊं बत्ती लड़कियां पास व्ही, जो लड़कां रे मुकाबले पांच दशमलव नौ-चार फीसदी बत्ती हैं सीकर जिला रा लक्ष्मणगढ़ री खुशी शेखावत 500 मांय ऊं 499 अंक हासिल कीनां खुशी वां री कामयाबी पाछे मायतां अर शिक्षकां रो खास योगदान बतायों

.....

दसवीं री परीक्षा मांय ई 95 फीसदी ऊं बत्ती लड़कियां पास व्हे गयी, जो लड़कां रे मुकाबले दो दशमलव तीन-सात फीसदी बत्तो हैं ध्यानजोग है के ई दफा 12वीं कक्षा मांय 88 दशमलव तीन-नौ फीसदी, जदके मैट्रिक रा इम्तिहान मांय 93 दशमलव छह-छह फीसदी विद्यार्थी पास व्हां प्रधानमंत्री नरेन्द्र मोदी सीबीएसई री 12वीं अर दसवीं री परीक्षा पास करण वाळा सगळा विद्यार्थियों ने बधाई दीनी हैं

प्रधानमंत्री सोशल मीडिया पोस्ट रे जरिये कह्यो के नतीजा विद्यार्थियों रा संकल्प, अनुशासन अर करड़ी मेहनत ने बतावे हैं मुख्यमंत्री भजनलाल शर्मा ई परीक्षा मांय पास व्हा सगळा विद्यार्थियों रा बेहतर भविष्य री कामना कीनी हैं

000

डाक विभाग किताबां अर भणार्ई-लिखाई ऊं जुड़ी सामग्री ने कम खर्च मांय भेजण सारु 'ज्ञान पोस्ट सेवा' सरु कीनी हैं इण रे जरिये भणार्ई-लिखाई री पोथियां अर सामाजिक-सांस्कृतिक साहित्य किफायती दाम माथे भेजा जा सकेलां

.....

000

खेलो इंडिया यूथ गेम्स मांय आज राजस्थान साइकिलिंग टाइम ट्रायल श्रेणी मांय लड़कां री तीस किलोमीटर री दौड़ मांय तीन ई तमगा जीत लीनां राम अवतार चिमप सोना रो, महादेव सरण चांदी रो अर महावीर सरण कांसा रो तमगो जीत्यों लड़कियां री बीस किलोमीटर साइकिल चलावण री होड़ मांय राजस्थान री मंजू चौधरी सोना रो अर रूकमणि कांसा रो तमगो जीत्यों पदक तालिका मांय महाराष्ट्र 89 तमगा जीत र अव्वल है, जदके राजस्थान 36 तमगां सागे दूजा पायदान माथे हैं

000

प्रदेश मांय आज केई ठौड़ां तेज गर्मी अर उमस बीचे दोपहरां पाछे जोरदार बायरो बाजण सागे बारिश व्ही कठे-कठे ओळा पड़बा रा ई समाचार हैं राजधानी जयपुर मांय ई बादळां री आमद-रपत रहीं हनुमानगढ़ मांय अंधड़ पाछे छांटो-छिड़को व्ह्यों भरतपुर मांय व्ही बिरखा पाछे मौसम खुशगवार व्हे ग्यों म्हाणा भीलवाड़ा खबरनवीस बतायो के ज़िला रा गांवाई हलकां मांय बिरखा व्हेवण सागे ओळा ई पड़्यां

.....
मौसम विभाग काल राज्य रा 21 ज़िलां मांय आंधी चालण अर बारिश व्हेवण सारू चेतायो हैं 15 मई ऊं राज्य रा आतूणी हलकां मांय लू बाजण सारू चेतायी ज्यो हैं ई दौरान पारो 44 ऊं 45 डिग्री सेल्सियस ताई पूगण रा आसार हैं महकमो तावड़ा अर लू ऊं बचबा री राय दीनी हैं

000

सामाजिक न्याय अर अधिकारिता विभाग मुख्यमंत्री अनुप्रति कोचिंग योजना रा तैत मेरिट रा आधार ऊं चुणी ज्या उम्मीदवारां ने 18 मई ताई कोचिंग संस्थानां मांय हाजिरी देवण री मंजूरी दे दीनी हैं इण ऊं पैली आ तिथि 11 मई हीं महकमा रा निदेशक अर संयुक्त शासन सचिव बचनेश अग्रवाल बतायो के आ योजना न्यारा-न्यारा प्रोफेशनल कोर्स अर सरकारी नौकरियां मांय भर्ती सारू व्हेवण वाळी प्रतियोगी परीक्षावां री बेहतर तैयारी करावण रा मकसद ऊं चलायी जा रही हैं

000

प्रदेश मांय सामाजिक सुरक्षा पेंशन योजना रो फायदो लेवण वाळां सारू सालाना भौतिक सत्यापन री मियाद बधा र 31 मई कर दीरीजी हैं सामाजिक न्याय अर अधिकारिता विभाग रा निदेशक बचनेश अग्रवाल बतायो के योजना रो फायदो लेवण वाळां री मांग अर सुबीता सारू विभाग ओ फैसलो कीनो हैं

000

प्रधानमंत्री नरेन्द्र मोदी 25 मई दीतवार ने आकाशवाणी ऊं प्रसारित कर्या जावण वाळा खास कार्यक्रम **मन की बात** मांय विचार बतावेलां आ हर महीना प्रसारित कर्या जावण वाळा ई कार्यक्रम री 121वीं कड़ी व्हेलां ई सारू आप ई 23 मई ताई सुझाव भेज सको हों आप मुफ्त नम्बर 1800-11-7800 या नरेंद्र मोदी एप या माय जीओवी ओपन फोरम रे जरिए सुझाव भेज सको हों ओ कार्यक्रम आकाशवाणी अर दूरदर्शन रा पूरा नेटवर्क, आकाशवाणी समाचार री वेबसाइट, न्यूज ऑन एआईआर मोबाइल एप, आकाशवाणी समाचार, दूरदर्शन समाचार, प्रधानमंत्री रा दफ्तर अर सूचना अर प्रसारण मंत्रालय रा यू-ट्यूब चैनलां माथे ई उपलब्ध रेहवेलां

000